

lis Gnovis

■ GURIZE. Pocâts fûr di confin

«Pocât fûr di confin. Cuatri areis di azions urgentis par fermâ lis violazions dai dirits dal om sui confins da l'Europe»: tes 64 pagjinis dal document presentât cun chest titul, la Commissarie pai dirits uman dal Consei d'Europe, Dunja Mijatovic, e documente miârs di violazions cuintri dai dispatriâts, capitadis par colpe dai 46 Paîs associâts te plui viere istituzion continental. In zornade di vuê, al denunzie il befel, «parâ fûr sfolâts, int ch'a domandin protezion e emigrants e je diventade una politiche uficiâl». Al sucêt anje su la «Trate balcaniche», dulà che l'Italie e je incolpade di «riamissions informâls» in Slovenie, che no son legâls. Seont la comission europeane pai dirits dal om, al è un scandal che «la vignude dai dispatriâts ucrains e sedi doprade par justificâ la proseuzion di azions par sburtâ indaûr in mût illegâl sfolâts, int ch'a domandin protezion e emigrants».

■ UDIN. Furlan certificât

In grazie dai imprescj didatics, presentâts di «ARLeF» ai 20 di Avrîl, si podarà inviâ anje la «certificazion de lenghe furlane». Al è un dai pas previodûts dal compatât firmât de agenziej regjonâl pe lenghe furlane cu l'Universitât dal Friûl par colaborâ te organizazion di cors di formazion e pe realizazion e publicazion di tescj e di struments didatics par imparâ il furlan, cul obietif di preparâ cui ch'al vûl otignî une certificazion. La professoressa Fabiana Fusco e à prontât 3 volums par valutâ i nivei progressifs di competence (A, B e C), su la fonde di ce ch'al stabilis il Cuadri comun european su lis lenghis. Te seconde fase dal progjet, ch'e partissarà in curt, si formarà i prins certificadôrs. Intant de presentazion, l'assessore par Istruzion, Ricerche e Universitât, Alessia Rosolen, e à pandût l'agrât de Regjon a Ateneu, «ARLeF» e «Cirf».

■ FORGJARIE. Testemoni di Flossenbürg

«O brami che tu restarâs cun nô te nestre clape, parcè che sierade l'ete dai paris, ur tocje a noaltris fis di restâ unîts par mantignî in vite la memorie»: a son lis peraulis scritis a Mauro Clemente dal president de Associazion taliane dai ex deportâts «Aned», Dario Venegoni, tal corot pe muart di so pari Enrico, publicât dal sfuei «Triangolo rosso», tal prin numar dal 2022. Enrico Clemente di Forjarie al è muart di 94 agns e al jere restât un dai ultins testimonis des crudeltâts e da la disumanitât dal «Lager» di Flossenbürg, dulà ch'a finirin deportâts 222 paisans de Provincie di Udin d'in chê volte.

■ MARSURIS DI DAVIAN. Cent agns cu la Latarie

Par Pasche, il boletin parochiâl de Gesie di Marsuris e dal so santuari, «La Sorgente», i à dedicât un suplement speciâl al centenari de Latarie sociâl, bramade di pre' Angelo Burigana e screade, vie pal 1922, dal so sucessôr, pre' Giorgio De Piero. Lis notis storichis e lis fotografis tiradis dongje a ufrissin une testimoniance sauride di 100 agns di economie e di vite comunitarie, ch'e anticipe i contignûts de convigne programade pai 14 di Mai cu ven, cuant che esperts locâi e regjonâi a resonaran su «La Latteria di Marsure compie 100 anni e ancora oggi racconta e fa vivere il territorio».

Mercus 27 S. Zite vergjine

Joibe 28 S. Valerie martare

Vinars 29 S. Catarin di Siene

Sabide 30 S. Piu V pave

Domenie 1 III Domenie di Pasche

Lunis 2 S. Atanasi v.

Martars 3 S. ts Filip e Jacum ap.

Il timp Timp ancjemò incert



Il soreli
Ai 27 al jeve aes 6.00
e al va a mont aes 20.10.



La lune
Ai 30 Lune gnove.

Il proverbi
Cjara cence pensâ al è tant che trai cence smirà.
Lis voris dal mès
Plantait cudumars, melons, anguriis, cocis,
melanzanis, vuainis. Al è rivât il moment
di tirâ sù ce che o vês semenât tai mès stâts.

Cjâf, panze o cûr?

Confront, a Triest,
sul ûs ostîl o noviolent
des peraulis

«Cul cîf, cu la panze, cul cûr»: sielzint chest titul, il «Festival della comunicazione non ostile» al intint di proponi la cuistion centrâl des sieltis: «La sielte des peraulis ch'a compagnin lis relazions di ognidun; lis sieltis, plui o mancun etichis, in cont di strategiis digjitâls des plateformis; lis sieltis di feminis e di umign ch'a contin il mudament di epoche; o anje lis sieltis devant di cheste vuere fûr dal vade e devastant». L'apontament anuâl, inmaneât dal progjet di sensibilizazion e di educazion cuintri dal ûs ostîl, «online e offline», des peraulis, «Parole O_Stili», al proponarà i siei apontaments dai 29 ai 30 di Avrîl, a Triest (<https://paroleostili.it/quinta-edizione-2022/>).

La prime zornade si vierzarà a 11, cul apontament in «streaming» ma anje di persone «Miassumo», destinât a lis scuelis secundariis di secont grât. Come relatôr, a son invidâts il ministri pe Istruzion, Patrizio Bianchi, e la «creator» e atore, Lodovica Di Donato. Dopomisdî (14.30-17.30), a son invidâts a confrontâsi su «Lis relazions digjitâls te ete dal "smart working"» lis aziendis e su «Genitori e insegnanti, non droppate questo panel!» i educadôrs (par un resonament condividût su «trend» e gnovis par judâ i fis a sielzi ce fâ su la rê des rêts). L'ultin apontament de zornade, di 18 a 19.30, al ufrissarà un profundiment sul mont dai «social» («Persone, hashtag e trend che raccontano il mondo»).

Sabide ai 30 di Avrîl, il «Festival della comunicazione non ostile» al proponarà il moment «Di pancia» (9.30-13) e il moment «Di testa» (13.45-16.30).

Te prime part de zornade, si discora-



Cun chest placat, il progjet sociâl «Parole O_Stili» al presente il «Festival della comunicazione non ostile»

Il «Festival della comunicazione non ostile» al propon la cuistion des «sieltis»

rà su «Creator, Talent, Influencer: dobbiamo stare ad ascoltarvi?», «Ti racconto come io e te stiamo cambiando» e «Ero un bullo».

Dopomisdî, i relatôrs invidâts di «Parole O_Stili» a frontaran lis cuistions dal «Social journalism», dal ûs dai «Profili social» e des peraulis dal «Digjitâl». Altris dôs sezions de convigne a saran intituladis: «È davvero un algoritmo a scegliere per noi?» e «Lui, lei, loro. Pronomi & Storie d'inclusione».

Fra i protagoniscj de iniziative formative, a spichin Cristina Fogazzi, Cecilia Sala, Mariangela Pira, Cathy La Torre, Silvia Boccardi, Riccardo Haupt, Giacomo Mannheimer, Francesca Milano, Francesca Rossi, Francesca Vecchioni e Federico Taddia.

Il progjet sociâl di «Parole O_Stili» al è nassût cul «Manifesto della comunicazione non ostile» e cul obietif di operâ par «ridusi, stagnâ e combati lis praticis e i lengaç negatîfs».

Un pôc a la volte, dal 2016 incâ, al à produsût i Manifestj pal Sport e pe Politiche «non ostili»; al à inmaneât percors di didatiche «online» e di Educazion civiche pes scuelis, ma

anaje percors formatifs pes aziendis; videos par fruts, libris e cuaders didatics.

Il so lavôr educatif e informatif al è stât premiât cu la medaie dal president de Republiche e cui premis «Indifesa», «Rete Critica» e «InspiringPR», ch'a à ricognossût l'ambizion di «Parole O_Stili» di tornâ a «definî il stîl che lis personis a àn cuant ch'a son su la Rêt internet» e di «slargjâ la dispozion positive a sielzi cun atenzion lis peraulis e a difondi la cusience che lis peraulis a son cetant impuartantis».

Mario Zili

Messe in marilenghe

A Udin, la Messe par furlan e ven cjantade ogni sabide, a 5 e mieze soresere (17.30), li de capele de «Puritât», daprûf dal domo. Sabide ai 30 di Avrîl al cjantarà messe pre C. Marchica. Radio Spazio e trasmet sul moment, ogni setemane, dute la celebrazion.

Tradizions furlanis dal mès

par cure di Mario Martinis

I PROVERBIS DI AVRIL

Dopo dal lunc unvier e i prins timits segnâi dal disveâsi, in avrîl la nature e pant dut il so sflandôr sot dai rais simpri plui cjalts dal soreli che al sflandore tal firmament. Te ultime desene dal mès la vierte si impon ad in plen, tocjant la metât dal so troi stagjonâl. L'om al à scomençât lis voris dai cjamps e al cjale di continui il cil tes sôs variacions atmosferichis, che a son decisivis pes coltivazions e pai prodots de tiere. Come simpri, anche in chest mès i proverbis, cu la lôr savietât populâr, a marchin lis carateristichis dal cil e de campagne, dant conseis e avvertiments utii riuart aes consecuencis che a vegnin de ploie, dal sut, dal cjalt, in particulâr te date di fonde de Pasche e dai «sants calendarîi» Zorç e Marc. Difât, te tradizion populâr la «mieze vierte» e vignive sacralizade (intune sorte di sacre omologazion) des fiestis di Sant Zorç (23-IV) e di Sant Marc (25-IV) che presiedevin il divisori de stagion e duncje la colme de germinazion vegetâl. Ve ca qualchi proverbî.



- In avrîl si bute la cjâlze pal curtîl
- Ploie d'avrîl e jempe il baril
- Avrîl bagnât, contadin furtunât
- Se al plûf il mès di avrîl, il vin al ven bon e zentîl
- Trop biel al è avrîl, tant brut al è mai
- La prime ploie di avrîl, il cai al salte fûr dal cuvîl
- Te Setemane Sante e cjape ogni plante
- La prime joibe d'avrîl si semene il basilî zentîl
- Se al plûf Vinars Sant, arsure l'an dut cuant
- Pasche di ulîf, si jes fûr dal nît
- Ulîf sut, Pasche bagnade; ulîf bagnât, Pasche sute
- Pasche vignî, cenâ e lâ a durmî, Pasche passade, cenâ e lâ te strade
- Se al plûf il dì di Sant Zorç (23-IV), il cavalîr al va pe cort
- A Sant Zorç si bute la cjâlze pe cort
- Se al tone il dì di Sant Zorç, dutis lis coculis a van pe cort
- La ploie di Sant Marc e dismôf il farc
- Sant Marc e Sant Zorç, la biele ore di meti sorc.